

Pablo Colosas Anoafo Kirika Kenexō Fomani

Pablo Jesús Ifofaafo kirika kenexō fomani, Colosas anoafo

1-2 Ēkīa Pablo, Niospa ea nīchini, aato apaiyai keskafakī ē yorafo yoinō Jesucristoōnoa. Nofe yora Timoteo feta nō mato kirika kenexō fomai. Mā Cristo Ifofakōikē, pexe rasi Colosas anoxō Nios nikakōiyanā. Nōko Epa Niospa mato noikī mato shināfafāinō afanā mato fekaxtefanōma mā isharakōinō.

Pablo a Jesús Ifofaafo ato kīfixōfafāini

3-4 Nā nōko Ifo Jesucristo āfe Apa Nios nō mato kīfixōfafāini. Nō mato kīfikī iskafaxokī aicho fakī māmāi nō nikax mā Cristo Jesús Ifofakōikē. Nāskaxō nā Jesús Ifofaa fetsafori mā ato noikōimiskē mā nō nikamis. ⁵ Na meka shara chanīmakōi Jesucristoōnoa mā mā nikamis. Jesucristo chanīmara faax Nios ika ari mā afe ipaxatiro ixō yoinifo mā mā nikamis. Na meka chanīmara fakōixō fetsafo mā ato noikōimis. ⁶ Na meka shara Jesucristoōnoa mā nikakī taefakī mā chanīmara fakī finakōini. Nāskaxō nikakī mā tāpini chanīmakōi, Niospa mato noikī Jesucristoōxō mātō chaka mato soaxoni mā chanīmara faino. Nāskakē na meka shara, nikakani maifo tii anoafori nāskarifiamisfo. ⁷ Nonori nofe yora Ipafras mato yoini. Akka nā Ipafras nofeta Cristo yonosharaxomis, nāskakē nāato Jesucristoōnoa mato yoipaoni. ⁸ Nā Ipafras matoōnoa iskafakī

noko yoiaito nō nikamis: “Na Colosas anoafo Niospa Yōshi Sharaōnoax isharakōikaxō fetsafo noikōikani,” ixō noko yoiaito nō nikamis.

⁹ Nāskakē nā ē matoōnoa nikakī taefanitīa, ē mato Epa Nios kīfixokī xatemisma. Kīfikī ē iskafa fafāfāini: “Epa Niospa, Colosas anoafo mī Yōshi Sharaōxō mī ato amapaiyai keskafakī ato tāpimafe, mī ato tāpimanai keskafakī āto ōiti mēraxō mia tāpikaxō mia Ifokōi fanōfo,” ixō ē mato kīfixōfafāini.

¹⁰ Nāskaxō nā mato amapaiyai keskara mā akaino ōi Nios matoki inimakōixii. Nāskax āfe Fake keskarakōi mā itiro. Nāskaxō mā fetsafo sharafa fafāfāikī mā Nios tāpiki finakōitiro. ¹¹ Akka Epa Niospa afama mīshtifo shara fatiroki, āfe kerex shara mitsisipakōi mato inātiro afara afeskarafi-aino aōxō mā tenekōinō. Nāskafikī mā tenetiro fena fenakīma inimasharakōikai. ¹² Nāskakē mā inimakōi. “Aicho Epa Niospa,” mā fatiro nāatomāi noko imasharata afe yorafo ināpaiyai keskafakī nokorimāi ināito. Nōri afe yorafokē noko inimamaxii, a ika anokai fakishma penasharakōi.

¹³ Nāskakē noko imasharakōia anā fakish mēra nō inōma. Akka nā Satanās ika ano fakishifākōi. Nānoa Epa Niospa noko ifia, āfe Fake fe nō ĩpaxanō. Nāato āfe Fake noikōi. ¹⁴ Āfe Fāke noko nāxonikē aōxō Epa Niospa noko ifia, nōko chaka noko soaxoyanā.

Jesús noko nāxonioānoax Nios fe nō isharapakenaka

¹⁵ Akka nō Epa Nios ōiyamafitirono āfe Fake Jesús mai ano oni. Nāskaxō āfe Fāke noko tāpimani afe keskaramākī Apa Nios. Nā āfe Fake Jesús Apa Nios keskarakōi, āfe ōiti keskarakōiri. Afaa oniataima

Apa Nios fe nai mēra iyopaoni. ¹⁶ Āfe Fake Jesucristoōxō Niospa keyokōi onifani, nai mēranoafoya nono mai anoafō. Nā nō ōitiromafoya, a nō ōitirofo onifani. Askatari āfe ājirifo nā afe ikafo onifata, niafakafāferi āto xanīfori onifani. Epa Niospa āfe Fake Jesucristoōxō keyokōi onifani. ¹⁷ Afaa oniataima Cristo iyopaoni. Āfe kerex sharaōxō keyokōi kexesharakōimis. Nāskaxō fishifo kexeta, xini kexeta, oxe kexeta, nōko mai kexeta famis. Akka nāfo kexeyamaino, chakanai fetsekerana. Nai fe mairi chakanakerana. ¹⁸ Tsōakai Jesús finōtiroma, afaa oniataima keyokōi finōyopaonixakī, iskaratīari keyokōi finōa. Nāfi nā chanīmara faafāfe āto Ifokōiki. ¹⁹ Nāskaxō Epa Niospa yoikī iskafani: “Ē imis keskai ēfe Fakeri nāskakōimis, nāskax nāri efe Nioskōi, nō nāskara rafekōi,” ixō inimakai Epa Niospa yoini. ²⁰ Jesús ifi cruz ikaki mastafono āfe imi foax noko nāxoni nōko chaka noko soaxoxiki. Nāskakē aōnoax Epa Nios fe nō anā isharatiro. Aōnoax keyokōi mai anoafōya nai mēranoafō afe isharatirofo.

²¹ Māto ōiti mēraxō mā Nios noikaspayanā, mā chakakōi fapaoni. Nāskata mā Nios fe rafeyamata, afe yorarikai mā ipaonima. ²² Nāskafikē āfe Fake Jesucristo nai mēraxō mai ano nīchini feronāfakekōi ikiyonō. Nāskax ifi cruz ikakinoax noko nāxoni, aōnoax Epa Nios mato fe rafexō māto chaka mato soaxotiro a keskara shara mā inō. Nāskax mā akiki nokoaito matoōnoa afaa chaka yoitiro. Nāskaxori mā yoitiro iskakakī: “Mī afara chakafamis,” ixō aōnoa mā afaa yoitiro. ²³ Nāskano na meka shara Jesucristoōnoa mā chanīmara faxō afara fetsa mā shināyamaino Epa

Niospa matoõnoa yoipakenakama iskafakī: “Mī afara chakafamis,” ixõ matoõnoa afaa yoipakenakama. Askatamaroko mā chanīmara faax mā inimakōiaito mato ifixii mā afe ipaxanõ. Mā Jesucristo āfe meka shara nikakī taefani keskafakī nānorikōi keyokōi ē ato tāpimani. Ēkīa Pablo, ē Epa Niospa āfe meka yoifafāini Jesucristoõnoa ato yoikī.

Niospa Pablo yoini a Jesús chanīmara faafo ato yonoxonõ

²⁴ Nāskakē ē inimai ē matoõnoax omiskōifi, māri afara afeskaraino mā Cristo Ifosharakōi faano. Cristo nokoõnoax omiskōini keskai, ēri nā afe rafemisfoõnoax nā Niospa fakefo atoõnoax ē omiskōimis. Ē matoõnoax omiskōita iskaratīari ē Cristoõnoax omiskōimis. ²⁵ Akka Epa Niospa ea katonī, a mato yonoxomis keskara ē inõ, āfe meka shara ē mato yoinõ. Nāskaxõ ea yoikī iskafani: “Na maniafo tii anoa ēfe meka shara Jesucristoõnoa ato yoifofāsafafe,” ixõ ea yoini. Nāskaxõ āfe kaifoma mēra ea nīchini. ²⁶ Na meka shara Jesucristoõnoa nōko xinifāfe tāpiyopaonifoma. Niospa ato tāpimayopaonima. Akka iskaratīa Niospa noko tāpimani nō afe yorafokē. ²⁷ Epa Niospa Cristoõnoa mato yoiyomis keskafakī keyokōi mato tāpimaxii, mato fisti tāpimatama, nā yora fetsafori ato tāpimaxii. Iskafakī ato yoixii: “Ēfe Fake Cristo mato fe rafekakāini, nāskakē mā chanīmara fatiro a ē ika ano efe ipaxakī. Nā Cristo isharakōiai keskafakī ēri mato askafatiro māri isharakōinõ,” ixõ mato yoini.

²⁸ Nō Cristoõnoa yoimis, keyokōi nō ato yoifofāsafamis keyokōi nō ato yoimis nikakōinõfo.

Mã isharakõiano nõ keyokõi Niospa ferotaifi nõ õimasharapai a keskara shara ixii. ²⁹Nāskakē ē mato yonoxokī finakõifafāini, Cristo āfe kerex shara ea ināno.

2

¹ Akka ē mato yoipai mã tãpinõ, ē mato Epa Nios kīfixõfafāini. Laodicea anoafõ yafi fetsafori a ea õimisfoma nãfori ē ato Epa Nios kīfixõfafāini. ² Nāskaxõ ē mato kīfixõfafāini mãto õiti mēranoax mã inimakõiyana, mã ranã mã nõinãkõinõ. Nāska faatanãxõ Epa Niosnoa xafakīakõi mã tãpitiro, akka a iyopaonifāfe Cristoõnoa tsõa tãpiyopaonima. Nāskakē iskaratīa xafakīakõi mato tãpimapai aõnoa mã tãpisharakõinõ. ³ Nãato keyokõi tãpikõia, Apa Niospa tãpia keskafakī āfe shinã mēraxori tãpikõia. Akka Epa Nios afarafo sharafoyakē, Cristoõxõ mã tãpitiro. ⁴ Nãnori ē mato yoi, tsõa mato pãrayamanõ, meka fetsafaxõ fanīrira mato yoipaikani kiki. ⁵ Ë mato fe iyamafiãxõ pena tii ē mato shinã. Akka matoõnoa nikai ē inimakõi, mã chanīmara fakõixõ mã Cristo nikakõiaito.

Jesucristo nõko õiti fetsafaxõfaano a keskara shara nõ inõ

⁶ Nāskakē mã nõko Ifo Jesucristo chanīmara fakõixõ, mã Ifofakõina. Nāskakē pena tii afe rafefafãikãfe. ⁷ Oa afara fanafono āfe tapo mai mēra chaikõi kaax ferõitiroma keskara, Jesúsri nāskarakõikī, afe rafefafãikãfe afaa chakafatama a keskara shara ixikakī. Ipafras mato yoini keskafakī pena tii nikakõikī Jesús chanīmara fafafaãikãfe. Nāskaxõ pena tii Epa Nios aichofa fafafaãikãfe.

⁸ Nāskakē kexemesharakāfe, fetsafāfe mato pārayamanōfo. Mā Jesús nikakōiai keskafakī anori mato yoipaikanima. Akka nā mato yoiaifo keskara mā ato nikakī kaxpakōi mā ato chanīmara fatiro. Nāfāfe Cristoōnoa yoikōikanima, nāskaxō nā imisfo keskakakī mato yoipaikani. Nā chanīmara faafāfema shināifo anori fisti mato shināmapaikani.

⁹ Akka Cristo fe Apa Nios nāskara rafe, Cristo noko keskara feronāfakekōifiax Apa Nios imis keskara nā nāskakōini. ¹⁰ Nāfi keyokōichi āto xanīfokōiki, xanīfo fetsafoya, a niafaka chakafāfe āto xanīfofo finōkōinīfofāna. Nāskakē mā Jesús fe rafexō mā afaa fetsa yopaima. ¹¹ Askatari mā Cristo Ifofai akka feronāfakefāfe āto foshki repa xatepaonifo, nāskaramāi feyafakatsaxakakī. Akka mā foshki repa xatefiafono māto chaka mato soaxotiro. Cristo fistichi māto ōiti mato fetsafaxotiro, māto chaka mato soaxotiro afianā a mā chaka apaoni keskara mā anā atama a keskara shara mā inō. ¹² Akka mā maotisasi faka mēra mā ikinitīa, nā mā chakafapaonifo oa maia keskara, askatari nā Jesús maifanifotīa a mā afara chakafapaonifo oa maia keskarafo. Mā faka mēra iki maotissimeax mā fininākafāni oa Jesús fe fininākafani shinātsatiro mā a keskara sharakōi ixiki. Niospa āfe kerex sharaōxō afianā Jesús otofani nā nō chanīmara fai. Askatari mai mēranoax Jesús otonitīa, māri afe otoni keskara itiro, a keskara sharakōi ixiki. ¹³ Mā Jesús Ifofaamax nā yora naa keskara mā iyopaoni. Nāskaxō mā afara chakafapaoni māto chaka xatexoma. Nāskafikē Epa Niospa Cristo otofani afe nipaxanō. Nāskarifiakī matori aōxō nimapakexatiro, nāskaxō nōko chakafo

mã noko soaxona. ¹⁴ Shinãkapo. Keyokõi nõ chakafamis keskara nõko chakafo Epa Niospa noko soaxoni, anã afoõnoa shinãyamaxii. Nãskano Niospa yoini keskara nõ nikatama afara fetsa nõ chakafapaoni. Nãfo keyokõi nõ chakafamisfo keskara kenepakea. Askafixõ ifi cruz ikakinoa Jesús mastanifoxõ nã nõko chaka noko soaxoni. ¹⁵ Akka Cristo ifi cruz ikakinoax noko nãxonixakĩ, Satanás yafi keyokõi niafaka chakafo finõkõia. Nãskakẽ noko anã afeskafatiroma, anã nõko ifo ixõ noko ìkitirofoma. Nãskakẽ Jesús ifi cruz ikakinoax naino Niospa keyokõi maifo tii anoafõ ato ispani na niafaka chakafo anã kerexfoma.

Jesús ika ari nai mẽra sharakõi nã fisti fichipaikãfe

¹⁶ Akka mãto xinifãfe ãto feyafati ipaoni xinia fena ikaino fista apaonifo. Askatari oxe rama kãiyaino fista apaonifo. Akka mato yoitirofo iskafakakĩ: “Afaa mã pitiroma askatari afaari mã ayatiroma. Askatari nõko pena tenetitã mãri tenetiro,” ixõ mato yoitirofo. Akka mã askayamaino fetsafãfe mato mekafakĩ ìchatirofo. Mato askafaifono ato nikayamakãfe. ¹⁷ Akka nã mãto xinifãfe ãto feyafati noko õimatirofo afe keskara iximãkai a Cristo oaino. Akka mã Cristo oano nã fisti nõ Ifofatiro. Nã nõ feyafamis keskara nõ anã atiroma. Cristo fisti nõ nikatiro a nõ ayopaoni keskara nõ anã axikima. ¹⁸ Õisharakãfe fetsafãfe mato pãrapaikani kiki iskafakakĩ: “Nõ afaa tãpiama. ãjirifo nõ kĩfitiro,” ixõ mato pãrapaikani. Afãfe afaa õiyamafikatsaxakakĩ afama mĩshtifo yoipaimisfo. ãto shinãmã shinãkata kakapaikõimisfo,

Niospa shināi keskarakai shināmisfoma. ¹⁹ Afokai Cristo fe rafepaikanima. Akka Cristo nōko mapo keskara askatari nō āfe yora keskara. Nāskaxō nōko yora nō kexesharax nō mitsisipakōi itiro. Nāskatari nōko pono efapayafo, nōko pono mīshti, nōko nami mēranoax ichanātirofo. Afeskatama nō isharakōinō. Akka nō Cristo fe rafekōiaito Epa Niospa āfe Fākeoxō āfe kerex shara noko inātiro a keskara shara nō inō. Nāskarakōi noko axopai.

²⁰ Mā oa Cristo fe naa keskara mā ini. Nāskakē iskaratīa a mā chakafapaoni keskara mā anā akima. Askatamaroko mā isharakōimis. Mā askaito nā chanīmara faafāfema mato afaa yoitirofoma. Nāskafekē, ſafeskakī mā ato nikaimē, mā ato nikaxō nā mato yoiaifo keskara ma apai? Nāskakē ato nikayamakāfe. ²¹ Nāskakē mato yoiki iskafapaikani: “Na afarafo meyamakāfe, afori piyamakāfe, mato ināifonori mātō mēkemā achiyamakāfe,” ixō mato yoipaikani. ²² Akka na mato yoipaiyaifo keskara Niospa anori ato yoiaima. Āa shinākaxō mato yoipaikani. Akka nā mato yoipaiyaifo keskara nāfo mā keyoxii, anākai afo inakama. Nāskakē ato nikayamakāfe. ²³ Chanīma, yora fetsafāfe shinākī iskafakani. Na ato yoiaifo keskara shara, nafāfe tāpikōiafo, a Niospa noko yoini keskarari tāpikōiafo. Nāskakē Niospa āfe ājirifo kīfifāikani. Nāskakatari ato fanīrira mekafamisfoma, askatari āto yorari mese famisfoma āa koshamemisfo. “Nafō sharakōifo,” ixō atoōnoa yoipaikani. Akka afokai isharakōimisfoma. A afarafo chakafaifo keskarakai xateafoma, chanīma nāfo kakapaikōimisfoki.

3

¹ Akka Cristo naax anã otoiñakafani keskai mări nãskariai afe otoiñakafani keskara mã itiro mã isharakõiax afe ipaxakĩ. Cristo iskaratĩa Apa Nios fe ika afeta keyokõi ikinã. Nãskakẽ aõnoa shinãta nã mato amapaiyai keskara aõnoa shinãfafaikãfe. ² Nãskakẽ nã Niospa fichipaiyai keskara fisti shinãkãfe, nãskakõixikakĩ. Akka nono mai anoxõ yorafãfe afara chakafapaiyaifo keskafakĩ mări askafayamakãfe. ³ Anã ẽ mato yoi Cristo noko nãxoni. Akka mã oa Cristo fe naa keskara iyoni, nãskakẽ iskaratĩa mã afe rafekakaini, Epa Nios feri mã askakakãini. Nãskariai Epa Niosri mato fe rafekakaini. Mã askaito tsõa mato tãpitiroma, a mã Cristo fe rafeai keskai ari askaxiki. ⁴ Cristo anã mai ano fotofaino mări afe ixii. Nãato noko ñkipakenaka. Nãskakẽ a keskara sharakõi nõri afe ixii, keyokõichi yorafãfe noko õixikani.

Nõ chaka iyopaonixakĩ iskaratĩa nõ õiti fena sharayakõi

⁵ Nãskakẽ a mã afarafo chakafapaoni keskafakĩ anã askafayamakãfe. Askarafo anã shinãyamakãfe. Askatari mãto ãfimafori chotayamakãfe, kãrofãferi mãto fenemafori chotamayamakãfe. Nãskaxõ ato chaka shinãmayamakãfe. Afarafori noiyamakãfe feronãfakẽfãfe mãto ãfima fichipaiyamakãfe, kãrofãferi mãto fenemafo fichipaiyamakãfe. Afara chakafori fichipaiyamakãfe, nã mã fichipaiyai fisti fichipaiyamakãfe. Mã askakĩ Nios mã noima, nã afarafo fisti noikĩ. ⁶ Askara chakafo Niospa õipaima, nãskakẽ ato omiskõimakĩ finakõixii nikayamaifono. ⁷ Nãskakẽ taeyoi chakakõi mã

iyopaoni Nios nikamax. ⁸ Mā mā askapaoniki. Akka iskaratīa a chakafo shināmakikāfe. Anā ōitifishkiyamakāfe, anā chaka shināyamakāfe, ato chakafayamakāfe, ato ĭchayamakāfe, askatari mātō axfapa meka chaka yoiyamakāfe. ⁹ Nāskakē mā ranā pāranōnāyamakāfe, mā taeyoi ipaoni keskara a chakafo mā mā potakōiakī. ¹⁰ A mā apaoni keskara anā atama iskaratīa, mā mā Jesucristo fe rafekōia a keskara shara ixiki. Akka Epa Niospa mātō ōiti mēra fena sharakōi mato ōi. Nāskakē a keskara sharakōi mato imafafāini, aōnoa mā tāpisharakōinō. ¹¹ Nō Cristo Ifofakē Niospa keyokōi nāskarafos noko ōi. Judeofo yafi a judeofoma, a kene tāpiafoya a kene tāpiafomari, yorafoya nafafo āto yonomatifoya a āto yonomatifomari Niospa nāskarafos noko ōi. Keyokōi nō afe yoraxō nō Jesucristo fisti yopakōi.

¹² Niospa mato noikī mato katonī afe yorafo mā inō. Aa keskara shara mato imaxiki. Nāskakē fetsafo noikī ato sharafa fafafāikāfe. Nāskakē fetsafo shināki nā mā apaiyai keskara fisti shinātama, fetsafāfe apaiyaifo keskarari shinākāfe, oi tsii faxō ato yoifafāikāfe. ¹³ Nāskakē fetsafo fe mēnāpaitama ato yoisharakāfe raenāsharaxikāki. Nōko Ifāfe mato raefa keskafakī fetsafo fe raenā faatanāsharakāfe. ¹⁴ Nāskakē nā ē mato yoiyai keskai, keyokōi noinākāfe, nō noināsharafinakōiaki. Nāskai nō noināx nō isharakōitiro, nā nōko Ifāfe noko yoini keskai nō noināsharakōiax nō nāskasharakōitiro. ¹⁵ Nāskakē Cristo nikasharakōikāfe mātō ōiti sharanokai mā fochishpanā faatanātiroma. Askatamaroko aōnoax isharakōiax nā yora fisti keskara shara mā itiro. Nāskakē Epa Niospa mato katonī aōnoax mā

isharakõita fetsafo mā afeska fanõma. Nāskakē mā Epa Nios yoitiro iskafakī: “Aicho Epa Niosi, ēfe õiti mā sharafaxõa,” ixõ mā yoitiro.

¹⁶ Cristo noko tāpimani keskafakī māto õiti mēra nanekõikāfe. Nāato mato ĩkinākī āfe meka tāpisharakõixõ fetsafori yoisharakāfe isharaxikakī. Māto õiti mēraxõ Nios aicho fata David fanāini keskai māri fanāixota āfe mekaõnoari fanāixokāfe. ¹⁷ Nāskaxõ nā mā apaiyai keskafakī yoikāfe iskafakī: “Aicho, Epa Niosi. Nõko Ifo Jesucristoõxõ nā nõ apaiyai keskafakī keyokõi mī noko axõfafāimis,” ixõ yoifafāikāfe.

Nõ Jesús Ifofakõinax aõnoa nõ afeskatiromāki

¹⁸ Kērofāfe, māto fenefāfe mato yoiāifāfe ato nikasharakõikāfe. Nāskax mā isharakõikai nõko Ifāfe mato yoiāi keskai. ¹⁹ Feronāfakefāfe, māto āfiffo noikõikāfe ato fe feratenāyamakāfe.

²⁰ Fakefāfe, māto epa yafi māto efa nikakõikāfe. Mā askaino nõko Ifo matoki inimakõi kiki. ²¹ Epafo feta efafāfe, māto fakefo ferateyamakāfe, māto fakefāfe shinākī iskafayamanõfo: “Ooa, ēfe epa feta ēfe efa ea feratenafo,” ixõ shināyamanõfo.

²² Āto yonomatifāfe, māto ifofo ato nikakõikāfe nono mai anoxõ. Akka mato õiaifonos ato yonox-okakīma, mato õiamaifonori ato yonoxokāfe. Nā māto Ifo Jesucristo mā noiaino, matoki inimanõ ato yonoxosharakāfe. ²³ Afara yonokī inimayanā axosharakõikāfe. Nõko Ifo shinākī ato yonoxosharakāfe. ²⁴ Nāskakē shināmakiyamakāfe mā mā tāpiaki nõko Ifo chipo afara sharafo mato ināxii kiki. Mā nõko Ifo Jesucristo yonoxosharamiski, nāfi māto Ifokõikī. ²⁵ Akka nā afara chakafamisfo,

nãfo omiskõï finakõixikani afara chakafakatsax-akakĩ. Nãskakẽ Niospa fetsa keskarafõ noko õïma, nãskarafõs noko õi.

4

¹ Ato yonomamisfãfe, mãto yonomatifo ato paraxõ yonokakĩma ato noisharayanã afara sharafo ato inãsharakãfe ato parakakĩma. Mã mã tâpiakĩ mãri Ifoyakĩ, mãto Ifãfe nai mëraxõ mato õifafaini kiki.

² Nãskakẽ Epa Nios kĩfiki xateyamakãfe, kĩfikĩ afara fetsa shinãkakĩma, Epa Nios fisti kĩfikĩ iskafakãfe: “Aicho Epa Niosi, mĩ ea sharafa fafafãini,” ixõ kĩfikãfe. ³ Nãskakẽ nokori kĩfixokãfe, Epa Niospa fetsafo mëra noko nĩchiano Cristoõnoa nõ ato yoisharanõ. Afãfe Cristoõnoa nikamismomaki. Akka ã Cristoõnoa meka shara yoiãito yorafãfe ea karaxa mëra ikimanifo. ⁴ Ea Epa Nios kĩfixõfafãikãfe xafakĩakõï Jesucristoõnoa anã ã ato yoinõ.

⁵ Akka nã Jesús Ifofaafoma mëra mã ikaki ato õimãkãfe mã isharakõixõ. Nãskaxõ mã mã atoki nokoaitĩa Jesucristoõnoa ato yoisharakãfe. ⁶ ato fe mekakĩ meka shara fisti ato yoifafãikãfe, ato kaxemetsama fakakĩma ato yoisharakõikãfe, ãto õiti mëraxõ shinãchakanõfoma. Mã askakĩ mã yorafo mã ato kexesharatiro.

Pablo mã mekai xatekĩ Colosas anoafõ ato meka shara fomani

⁷ Nofe yora Tíquico, ã aõ noikõï. Nãato efeta nõko Ifo Jesús yonoxomis. Nãskakẽ aato eõnoa mato yoi kiki ã afeskax nono ikamãkĩ. ⁸ Nãskakẽ ã mato ari nĩchia, aato mato yoinõ afeskax nono nõ ikamãkĩ, askatari mato inimamasharakõixiki. ⁹ Nã nofe

yora Onĩsimõri afe kai, nãri ã noikõi. Nã mato fe iyopaoni, nofeta nõko Ifo Jesúsnoa yoi inimakõimis. Nã rafeta matoki noko kaxõ mato yoikani nono afe keskaramãki.

¹⁰ Akka na efe karaxa mẽra imisto Aristarcori mato meka shara fomai. Marcosri mato meka shara fomai, nã Marcos Bernabé ãfe chai. Nãskakẽ nã Marcos matoki nokoaito ã mato yoia keskafakĩ ifisharakãfe kexesharayanã. ¹¹ Na feronãfake ãfe ane Jesús nãatori mato meka shara fomai, ãfe ane fetsa Justo. Nãfãfe judeofo mẽraxõ Nios Ifokõi fakaxõ efeta Nios xanĩfoõnoa yoikĩ yonomisfo. Nãskafakakĩ ea inimamakõimisfo. Akka ãfe kaifãfe nonoxõ efeta Nios yonoxomisfoma, nã ã mato yoiaifo feta ã Niosnoa yoimis. ¹² Na feronãfake Ipafrasri meka shara mato fomai, nãatori Cristo yonoxomis, nã mato mẽra iyopaoni. Nãato mẽxotaima matoõxõ Epa Nios kĩfikĩ iskafa fafãfãini: “Epa Niosi, mĩ ato amapaiyai keskafakĩ ato amafe afaa fetsa shinãnofoma. Nãskakanax mĩ Fake Jesús õiti keskara shara inõfo,” ixõ mato kĩfixõfãfãini. ¹³ Akka mẽ õia na Ipafras matoõxõ shinãchakakõiaito. Askatari nã pexe rasi Laodicea anoafõ yafi Hierápolis anoafõ ato Epa Nios kĩfixõfãfãini. ¹⁴ Na Lucas ato sharafamis, ã aõ noikõi. Nãato Demãs feta mato meka fomakani.

¹⁵ A Jesús Ifofaafõ Laodicea anoafõ ea ato yoisharaxõfe. Nĩnfasri ea yoisharaxõfe, a ãfe pexe anoax Nios Ifofakanax ichanãmisfori ea ato yoisharaxõfe. ¹⁶ Akka na kirika kene ã mato fomai mã mã õixõ, nã Nios Ifofaafõ Laodicea anoafõri ato fomakãfe akairi õinõfo. Mãri na kirika kene õikãfe Laodicea anoxõ mato mana manafono. ¹⁷ Nãskakẽ Arquipori ea yoikĩ iskafaxokãfe: “Epa

Niospa mia yoia keskafakĩ axosharakõife,” ixõ ea yoisharakõife.

¹⁸ Ēkĩa Pablo, ã mato kirika kenexoni. Mato yoisharakĩ, ãfe mifikõichi ã kenei. Nãskakẽ ea shinãmakiyamakãfe ã karaxa mẽraxõ ikakĩ. Niospa mato noikĩ matoõnoa shinãfafãinõ. Nã tii.

Niospa meka fena Jesucristo^{noa} New Testament in Yaminahua (PE:yaa:Yaminahua)

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 22 Feb 2024 from source files
dated 29 Jan 2022

6c7b7ce2-9d87-5405-91e6-71ce1387adcc